

Prvi zamjenik Visokog predstavnika, Donald Hays, poziva političke vođe BiH da prihvate koherentnu strategiju ekonomskog razvoja

Prvi zamjenik Visokog predstavnika, Donald Hays je u četvrtak apelirao na čelnike BiH da još jednom pokažu postojanje političke volje koja je hitno potrebna kako bi se stvorili uslovi za pokretanje ekonomije i osigurala istinska dobrobit za građane BiH.

U svom obraćanju na konferenciji u Sarajevu, koju je organizirao britanski list "Economist", ambasador Hays je konstatirao da je u politici Bosne i Hercegovine došlo do značajnih promjena otkada je na vlast stupila Alijansa za promjene i stavila ekonomski razvoj u sam vrh svog političkog djelovanja. On je rekao da je uspostavljanje neophodnog okvira za održivi razvoj BiH bio proces koji se konstantno razvijao, te da je taj proces ubrzan u toku prošle godine. On je dodao da će pozitivan rezultat ustavne debate usmjerene na provođenje Odluke Ustavnog suda o konstitutivnosti naroda i uvođenje četverogodišnjeg izbornog ciklusa nakon predstojećih izbora, doprinijeti normalizaciji političke situacije u BiH.

Međutim, ambasador Hays je istakao da političko rukovodstvo još uvijek posvećuje premalo pažnje definiranju sveukupne strategije koja će pomoći Bosni i Hercegovini da privuče strane ulagače i iskoristi prednosti liberalizacije regionalnog tržišta. On je istakao očigledno nepostojanje koherentne državne politike za razvoj infrastrukture i napomenuo da se debata o provođenju reforme obrazovnog sistema treba usmjeriti

na utvrđivanje najboljeg načina na koji bi se akademski standardi podigli na viši nivo i obrazovala radna snaga u BiH koja će moći da se uhvati u koštac sa izazovima globalnog tržišta, a ne na kulturološke ili lingvističke "razlike".

Ambasador Hays je takođe napomenuo da se neke vođe države diskreditirane prakse iz prošlosti kao što je imenovanje na javne funkcije na osnovu pripadnosti određenoj političkoj stranci, a ne na osnovu sposobnosti kandidata, i nastojanje da se izvrši utjecaj na svakodnevne aktivnosti regulatornih agencija koje po prirodi svog posla trebaju biti istinski nezavisne.

Ovaj zastarjeli način razmišljanja je takođe utjecao na brzinu odvijanja procesa privatizacije, te na strana ulaganja. "Ova zemlja se suočava sa hitnom potrebom za ulaganjima i otvaranjem novih radnih mjesta. Jedini način na koji se u ovom momentu mogu stimulirati kapitalna ulaganja je putem agresivne privatizacije i razjašnjenja vlasničkih prava nad imovinom" rekao je ambasador Hays. "Još uvijek je prisutna izvjesna doza skepticizma prema stranim ulaganjima – pogrešno uvjerenje da stranci kupuju najveća bogatstva ove zemlje. Ulaganje stranog kapitala je od osnovnog značaja ukoliko se žele razviti produktivna preduzeća i otvoriti nova radna mjesta."

Ambasador Hays je napomenuo da se "tranzicija Bosne i Hercegovine iz ratnog u mirnodopsko stanje i iz komunizma ka tržišno orijentiranoj demokraciji ne odvija u geopolitičkom vakumu." Ostvaren je napredak u kontekstu evropeizacije BiH. "Uključivanje u najvažnije evropske tokove, što predstavlja zajednički cilj svih naroda ove zemlje bez obzira na njihova politička opredjeljenja ili pripadnost, je striktno definiran" rekao je ambasador, napominjući da je za ostvarenje ovog cilja potrebno da "lokalni organi vlasti pokažu istu energičnu opredijeljenost za evropski ideal kakvu pokazuju obični građani ove zemlje".

Ambasador Hays je zaključio da poslijeratni oporavak Bosne i Hercegovine može biti jedna od najimpresivnijih priča 21. stoljeća, pod uslovom da političko rukovodstvo BiH kompletira okvir koji je nužan za pokretanje ekonomije i na čijoj se uspostavi u proteklih nekoliko godina predano radilo.